

國朝耆獻類徵初編卷四百七十一目錄

隱逸十一

陳愼

米肇頤

弟肇灝

張九仞

王泰徵

儲稠若

李確

鄭嬰垣

理洪儲

董說

陳南箕

弟觀

吳浩然

邱子章

姜琛

姜垓

琛子實節

垓子寓節

祁牙佳

祁班孫

鄒之麟

萬壽祺

錢棻

楊彭齡

趙繼鼎

閻修齡

國朝耆獻類徵初編卷四百七十一

通奉大夫前署江西巡撫江西布政使司布政使湘陰李桓輯

隱逸十一

陳愼

予之頌服陳先生也自成童而已然先生諱愼字我虔號永修吾
郵里四義村人先朝己卯歲以鄉貢爲應天府學教授其先世光
烈公正德辛未進士文章行業彪炳一時至懷丹翁而家聲逾遠
行履方整有先民之矩卒臻上壽人士仰之懷丹翁實生先生先
生名譟詞壇者二十餘年先大夫與之爲友嘗誨予曰是誠有道
者同人中指不再屈表裏洞然篤行君子也爰是心淑先生矣先

生官金陵教多士當世風趨下之日一以返樸還淳爲指歸多士
矜式之 新朝革命先生賦歸來壺觴自好儼陶公之在東籬也
嗚呼先生之爲人臣忠矣古之所稱忠臣不二厥事不奪其志已
爾豈在爵秩之崇卑哉先生潛居二十有八年予解組歸幸事吾
母尤幸近先生之居因得稔知先生之所以事其親者尊人疾篤
時禱於神願以身代乞假尊人十年壽果如所請嗚呼先生之孝
也誠矣人見先生坦易和樂與天爲游黃髮兒齒顏無衰替殆神
仙者流也而不知其得於性者粹以全服於道者深且至也先生
有孫能述先生之事先生可以不朽矣歿之日凡爲先生之嫺友
者靡不歔歔悼痛謂先生之貧異於常人其喪也當歲之貧異於

常歲嗚呼先生之所以異於人者豈不以貧哉先生好道故樂居貧與貧終始先生之志也雖然予懷先生失茲典型哲人云亡云胡不傷乃誄曰

凡人之生埏埴自天毀之削之以喪其年智誘物化厥初不全嗚呼先生壽固宜然凡人之生慕富與貴古誼不敦衾影叢媿樂道安貧儒者分內嗚呼先生睟面盎背凡人之生知愛其親服勞奉養謂職已勤大孝慕之遂忘其身嗚呼先生至誠感神凡人之生學爲事君一出一處乃明其倫疇能不詘疇能秉貞嗚呼先生臣節克敦凡人之生營營苟苟及其既喪草木同朽無善於前無名於後嗚呼先生德流永久先生往矣行道興悲嗟此學人將安取

師雨花臺圯雞籠山顏先生之澤百世猶思邛溝月白雙社珠輝
先生之風振古如茲

右哀詞孫宗彝撰

米肇頤 弟肇灝

米肇頤字觀甫御史助國次子崇禎朝歲貢官銅仁知府擢安順道

辰州志肇頤官銅仁遭流寇攻城城中兵不及千人賊兵數萬肇頤身先士卒斬殺無算賊敗走不復敢近以功遷擢自以家世祿仕欲盡瘁報國而事卒不可爲遂挂冠歸

右湖南文徵羅汝懷錄

米肇灝

米肇灝字梁若一字大程助國第三子崇禎末歲貢

辰州志肇灝生當萬厯時承祖父科甲之後攻苦欲繼先業有爲

張九仞

張九仞名嶺以字行和之含山人五世祖珉以歲貢官廣東布政使司都事有賢聲珉孫歲貢灝灝曾孫守傑有勇略生五子次子塘報把總嶽能日行三百里其四則九仞也貌魁梧鬚髯如戟好觀古名將方略與屠釣豪俠者遊明季流寇大起九仞慷慨語曰壯士立功名在此時矣襄城伯李守綺和人也物色之徵至京補關東把總生擒劇賊貼天飛擢錦衣把總又擢守備掌厚載門初秦寇陰結某內侍爲奧援及是警報日至九仞方隸某麾下圖往剿不知其貳於寇也比至全軍潰降九仞憤激大呼揮刀殺數賊隻身歸得不坐未幾乞休南還遇獻賊邏軍執之幾不免乘間斃

二守者泗水遁歸時崇禎八年乙亥也當是時淮南遭屠殺殆徧和含日夜警矣九仞父故爲材官奉巡按檄團結鄉勇九仞至以軍法部署之北向瀝酒誓殺賊報國遂結石砦於桃花山會縣令邀九仞城守九仞曰賊號百萬所過皆齎粉豈頽垣所能支乎宜壁險清野以禦之不然徒飽虎口令書生計逡巡未決十二月九仞偕遼客楊鳳芝以兩騎北覘賊至尉子橋遇賊前鋒流矢中馬首馬蹶九仞挾馬行數步示勇乃棄馬發二矢徐步而返賊大驚曰此健者不可犯檢二矢其觀之矢特長大曰此關東矢也關東大兵在含山含山不可入遂由昭關外趨和州鳳芝素口吃頗善高歌至是策馬先到城急不能言惟手北指面發赤眾驚顧曰汝

唱諸鳳芝乃徐引吭高歌得成聲曰流賊到昭關含小兒至今傳
其音爲戲時男婦數千得急入諸山豫避賊其近桃花山者多依
九仞砦中賊旣破和州知含山無大兵也遂至含含城已空賊流
言曰和州籠雞含山雀飛賊野掠至桃花山薄砦蜂擁而上九仞
怒鎧冑立峯巔推石下大如牛中三賊陷入土羣賊愕然曰挾馬
者乃在此眾因鼓譟乘勝下賊奔潰徑去九仞亦以巨石故傷擊
含山不至慘遭屠戮者九仞探賊力也是年有曾衡武者聞九仞
風守楊林圩圩徑四十里環運漕鎮周遭皆水衡武生有神力時
年二十有五因水拒賊賊撤屋剖厝棺編筏渡河衡武令眾據河
岸接戰而身泅水敗其筏賊輒墮水死竟不能渡合圩免害皆九

國朝書牘類稿卷四
仞倡之也後賊數犯含終不敢近桃花山入國朝九仞散遣諸客課子孫耕讀者數十年鄉黨推賢直焉卒於家

贊曰余聞鄉先生言某令時有毛生者與令比一日以公事譴官署九仞義形於色忿然數毛欲拳之毛疾走入內署乃免剛矣哉若其神勇偉略與吾含仇公成華公高李公彬何異乃值明之初佐命爲公侯值明之季勲不彰於國可慨也然功在含人與諸公後先相望矣

右傳王善櫛撰

王泰徵

王先生泰徵字嘉生其系出自瑯琊後遷徽之祁門唐乾符中避黃巢亂又遷於歙數傳族益大士人嘖其邨曰王干故先生爲歙縣人大父贈給事公世綱父鄉飲公文謨皆客於江陵先生生其地故遂寓籍爲江陵學生自少善屬文名譟湖襄閒年二十餘嘗以貢試抵會城有前輩白君某者素知名至是年且老矣與先生值詢名氏先生具以對白君愠曰吾聞王嘉生名已久計其年當與吾相輩行若年少奈何妄語旣而知其果先生也始大歎服又嘗醉登黃鶴樓適諸名士方大集先生故使酒乘醉遽出語侵眾眾亦醉爭起誰何之至有欲毆者或從旁識先生乃嘖曰此江陵

王嘉生女曹素所嚮往者也眾大驚遂延先生上坐與定交其見
重如此先生屬文甫就卽爲同儕傳誦以熟往往竊其所作取科
第去而先生猶浮沈諸生中踰壯始舉於鄉越七年始成進士出
馬文忠公世奇之門釋褐廣東吳川知縣調繇新會丁母艱服闋
補福建建陽縣所至俱大著聲績崇禎十七年以卓異擢禮部主
事會愍帝之變竟不赴官歸隱歎之檀山杜門教授爲業蓋先生
之學非獨長於舉子義也其於經史百氏無不淹洽旣居文忠公
門習聞其論議所學益進每與人辨說必旁引曲證纚纚數千言
具有條貫及其見之於文尤深沈曲折可驚可喜由是徽之學者
悉羸糧笥書往從先生游歲亡慮數百人一經指授其高第顯名

者後先亦不啻數十人先生每出游山水閒不攜僉從或以一童子自隨或諸門生相扶掖而已晚年病足久不療用晉習鑿齒故事作半士賦寓意中間雜以譏諷其援據甚博徽人皆誦述之年七十有六卒於家嗟乎天之生材也未有有其具而不適於用者也然而見用者恆少而湮沒於窮巖深谷者恆多如先生其一也使先生肩出所長以與時賢相角逐未必不比肩抗踵也而顧放棄乎寂寞之瀕優游乎塵壒之外訖於老且歿而不用豈非其不幸耶抑予聞之昔文中子之在隨也其門有魏鄭公薛太常之屬吳淵穎之在元也其門有宋文憲公王忠文公之屬故身雖不偶而所造就弟子率號興王之佐後世稱說其師道數傳不衰今先

生亦然距先生之歿已十餘年矣而徽士大夫之在朝者濟濟並列溯其師友淵源一惟先生之歸夫豈遂遜於文中淵穎哉則亦未可謂之不幸也予故聞先生之風而樂道之遂從其仲子基棠之請采掇遺事如此

右小傳汪琬撰

儲稠若

士之處亂世甘肥遯潔已而考終必有名以處此夫肥遯逃名惟恐不遠今日必有名以處何耶君子可逃名而不可令人不能名不能名者惟老聃然而以柱下名蒙莊老聃之流也而以漆園名儀封石門不名其名而以儀封石門名毛公辭公儀石之流也不名其名而以博徒賣漿名梅福毛辭之流也而以市卒名其次或以一藝一事名陶安公以冶名沮溺以耕名陶朱以貨殖名韓康臺佟以賣藥名嚴遵以卜名許陽以巫名申屠蟠以漆工名梁鴻夏馥以傭名馬瑤以免冑名姜岐以蜂豕名宋勝之以牧名尸鄉翁以鬻雞名朱桃椎以捆屨名又其次以僻名邱訢名傲顧凱之